

Visoki predstavnik u Stocu: Intenzivniji dijalog je jedini način da se mlađi ljudi zadrže u ovoj zemlji



Visoki predstavnik Christian Schmidt u utorak je posjetio Stolac gdje se sastao sa direktorima Osnovne škole Stolac i Prve osnovne škole Stolac – koje rade kao “dvije škole pod jednim krovom” – Katarinom Matić i Ademom Haračićem. Schmidt je pozvao vlasti u svim dijelovima BiH da rade više na iskorjenjivanju svih oblika diskriminacije u obrazovnom sistemu BiH.

Narodi Bosne i Hercegovine trebaju biti u mogućnosti da nastave učiti, raditi i živjeti zajedno kao što su to činili generacijama, zaključio je visoki predstavnik, te naglasio kako je dobro i neophodno što će cijela škola sada biti obnovljena nakon prošlogodišnjeg zemljotresa. Istovremeno, javnost treba da prepozna napredak i pozitivna dešavanja u Stocu.

Visoki predstavnik se također sastao sa gradonačelnikom Stoca Stjepanom Boškovićem i razgovarao o cijelokupnoj situaciji u ovom gradu. Visoki predstavnik je rekao da je intenzivniji dijalog koji premošćuje etničke i stranačke barijere jedini način da se postigne napredak: „Važno je da svi građani Stoca pronađu zajednički jezik i krenu naprijed zbog bolje budućnosti za sve. Vlasti treba da stvore sigurno i stabilno

okruženje kako bi privukli investicije i uvjerili mlađe ljudi da ostanu živjeti u ovom prelijepom gradu“, rekao je visoki predstavnik.

Visoki predstavnik je tokom sastanka sa šefom Izvršnog odbora Medžlisa Islamske zajednice Stolac, Orhanom Tikvešom, istakao važnost međureligijskog razumijevanja i dijaloga, te očuvanja jednakih prava za pripadnike svih vjeroispovijesti, jer je to jedini način da se očuva bogat i raznovrstan kolorit koji čini bosanskohercegovačko društvo. Visoki predstavnik je također posjetio lokaciju budućeg mezarja prema prijedlogu Grada Stoca.